

ՀՀ Գեղարքունիքի մարզպետ Կարեն Սարգսյանի շնորհավորական ուղերձը՝ Նոր ուսումնական տարվա առթիվ

Սիրելի՛ աշակերտներ, ուսանողներ, մանկավարժներ, ծնողներ և կրթության ոլորտի աշխատակիցներ,

Սրտանց շնորհավորում եմ ձեզ սեպտեմբերի 1-ի՝ Գիտելիքի օրվա և նոր ուսումնական տարվա մեկնարկի կապակցությամբ:

Սեպտեմբերի 1-ը մեզ համար պարզապես ուսումնական տարվա սկիզբ չէ. այն նոր ճանապարհի սկիզբ է՝ լեցուն սպասումներով, պատասխանատվությամբ և ամենակարևորը՝ հավատով կրթության ուժի նկատմամբ: Այս օրը հատկապես հիշարժան է այն փոքրիկների համար, ովքեր առաջին անգամ ոտք են դնում դպրոց՝ բացահայտումների և փորձառությունների մեծ սպասումով:

Ցանկանում եմ, որ այս նոր ճանապարհը բոլորի համար լինի լիարժեք՝ ոչ միայն ձեռքբերումներով, այլ նաև փորձով ու ինքնաճանաչմամբ: Կրթությունը պարզապես տեղեկատվություն չէ. այն արժեհամակարգ է, մտածողություն, և ապրելակերպ: Թող այն դառնա ձեր ամենօրյա ուղեկիցը՝ ձևավորելով ինքնաբավ, պատասխանատու և պետության հանդեպ պարտաճանաչ քաղաքացի:

Հարգելի՛ մանկավարժներ,

Ձեր նվիրումը կրթության հանդեպ անգնահատելի է: Ձեր ամենօրյա սրտացավ աշխատանքն ու մասնագիտական պատասխանատվությունը տալիս են այն ամուր հիմքերը, որոնց վրա կառուցվում է մեր վաղվա օրը: Շնորհակալ եմ ձեր հետևողականության, համբերության և ազնիվ աշխատանքի համար:

Թող 2025–2026 ուսումնական տարին լինի խաղաղ, բովանդակալից և արգասաբեր: Թող այս տարում ավելի շատ հարցեր առաջանան, քան պատրաստի պատասխաններ, քանզի հենց հարցեր ձևակերպելու ունակությունն է կրթության իսկական արժեքը:

Շնորհավոր Գիտելիքի օր: